



MEMORIA XUSTIFICATIVA E ECONÓMICA RELATIVA AO CONVENIO DE COLABORACIÓN ENTRE A CONSELLERÍA DE INFRAESTRUTURAS E MOBILIDADE DA XUNTA DE GALICIA E O CONCELLO DE RIBEIRA, PARA O ESTABLECEMENTO DE ACCIÓNS DE PROMOCIÓN DA UTILIZACIÓN DO TRANSPORTE PÚBLICO NO CONCELLO DE RIBEIRA

1. Antecedentes

O proxecto de Convenio de Colaboración entre a Consellería de Infraestruturas e Mobilidade da Xunta de Galicia e o concello de Ribeira ten a súa orixe nas diversas actuacións orientadas á promoción do transporte público que está a desenvolver a Consellería de Infraestruturas e Mobilidade e que presentan elementos de coincidencia coa vontade do concello de Ribeira de contribuír á mellora da mobilidade, mediante o establecemento de determinadas bonificacións tarifarias dirixidas ás persoas usuarias.

2. Obxecto

O obxecto deste convenio é fomentar o emprego do transporte colectivo nos servizos que comunican as diferentes parroquias do concello de Ribeira entre si, principais focos de demanda de mobilidade da súa poboación así como a introdución de bonificacións especiais a colectivos específicos como parte da implantación de determinadas medidas de políticas sociais no termo municipal.

3. Finalidade e xustificación

O proxecto de Convenio establece varios **tipos de bonificacións** para o usuario de transporte:

- a) **Bonificación de uso xeral:** Aplicarase a todas as persoas usuarias que fagan uso da Tarxeta do Transporte de Galicia, TMG, da TMG Xente Nova ou doutras tarxetas integradas (actualmente, a *Tarxeta Millenium* da Coruña e a *Tarxeta Cidadá* de Lugo), nos desprazamentos correspondentes ás relacións de tráfico incluídas no ámbito de aplicación deste convenio por concesións de servizo público de transporte adheridas ao





mesmo. Neste suposto o importe da tarifa a aboar pola persoa usuaria terá unha bonificación de 0,50 €, respecto do importe previsto en cada momento no correspondente contrato de concesión para o pagamento con TMG; polo tanto, o importe a pagar inicialmente utilizando as ditas tarxetas é o de 0,85 €/viaxe.

- b) **Bonificacións sociais:** Á tarifa xeral bonificada establecida no apartado anterior resultarlle de aplicación unha bonificación adicional a favor daquelas persoas que, identificadas polo Concello de Ribeira na aplicación informática habilitada para tal fin pola Xunta de Galicia, pertencen a certos colectivos para os que este concello acorde establecer este tipo de bonificación adicional.

Inicialmente, os colectivos designados polo Concello de Ribeira, son os seguintes:

- Estudantes: bonificación adicional de 0,25 € sobre a bonificación xeral.
- Pensionistas: bonificación adicional de 0,15 € sobre a bonificación xeral.
- Persoas en situación de risco ou emerxencia social: bonificación equivalente ao importe total que lles correspondería abonar polo servizo de transporte (inicialmente, 0,85 €)

Para acceder á bonificación social as persoas usuarias deberán dispoñer dunha TMG, cumprir os requisitos xerais e específicos para cada colectivo que aparecen determinados no anexo II ao presente Convenio e aqueles outros que, se fose o caso, establece o Concello de Ribeira, acreditar o cumprimento dos ditos requisitos mediante os medios que, en cada caso, determine o concello de Ribeira, e ser habilitados por parte deste concello na aplicación informática TARSOC, habilitada para tal fin pola Xunta de Galicia.

- c) **Bonos da concesión.** Adicionalmente, no caso daquelas concesionarias que asuman a utilización da TMG para a xestión dos bonos previstos no proxecto de explotación, ás bonificacións previstas anteriormente acumularanse ao desconto que corresponde á empresa concesionaria do servizo de transporte en relación á comercialización de bonos de 50 viaxes.

Neste caso, a aquelas persoas usuarias que, cunha mesma tarxeta de transporte TMG, realicen 50 viaxes no mes natural, reintegraráselles o importe correspondente ao desconto previsto para o respectivo abono de 50 viaxes, con cargo á empresa





concesionaria. A Dirección Xeral de Mobilidade poderá acordar a aplicación das regras establecidas para o bono de 50 viaxes a calquera outro bono que as concesionarias comercialicen no seu ámbito de aplicación.

Sen prexuízo do anterior, o Concello de Ribeira resérvase a facultade de aplicar as bonificacións previstas anteriormente tanto a aquelas persoas que opten pola adquisición destes bonos directamente á empresa concesionaria, como no suposto de que por parte destas últimas non se prevea a xestión destes bonos a través do sistema previsto neste apartado por parte dalgunha das empresas concesionarias dos servizos previstas no anexo I do convenio.

As tarifas resultantes da aplicación dos descontos abonados polas Administracións veranse incrementadas na medida na que o sexan as establecidas nos correspondentes contratos, salvo que as partes acorden, no seo da comisión de seguimento prevista neste convenio e logo da tramitación contable que corresponda, o incremento das correspondentes bonificacións.

A aplicación das bonificacións nos tráfico correspondentes deberá contar coa previa implantación dos sistemas de cancelación da Tarxeta TMG nos contratos que se adhiran, xa que será preciso o emprego desta tarxeta para o seu aboamento. No caso das bonificacións sociais esta tarxeta deberá estar dada de alta na aplicación da tarxeta social, TARSOC, que tamén é empregada para as bonificacións de carácter social no Transporte Metropolitano de Galicia.

O aboamento das bonificacións de uso xeral á persoa usuaria efectuaranse mediante desconto aplicado directamente no pagamento realizado no autobús coa tarxeta de que se trate (TMG, TMG Xente Nova, *Millenium* da Coruña e *Cidadá* de Lugo).

Para a aplicación das bonificacións sociais determínase o seguinte procedemento:

- Para os perfís sociais recollidos no Anexo II do presente Convenio, que acrediten a súa condición, o concello xestionará directamente a alta, baixa ou modificación de persoas usuarias e tarxetas asociadas a través da aplicación TARSOC, habilitada pola Dirección Xeral de Mobilidade para a xestión da denominada "TMG social". Por





tanto, só poderán acceder ás bonificacións sociais aquelas persoas titulares de tarxetas TMG que o concello manteña en situación de alta en cada momento.

- As persoas usuarias de alta na aplicación TARSOC, ao facer uso dos servizos de transporte, deberán pagar no autobús o importe da viaxe coa súa tarxeta TMG que teñan asociada na dita aplicación, aplicándoseles por tanto de xeito automático a bonificación de uso xeral (0,50 €/viaxe) nos mesmos termos que o resto de beneficiarios.
- A bonificación social adicional que lle corresponda á persoa usuaria farase efectiva para as persoas beneficiarias no momento no que estas efectúen a recarga da tarxeta a partir de finais do mes seguinte a aquel no que realizasen a viaxe. As persoas beneficiarias disporán do prazo de dous meses para aceptar cada bonificación dende a data na que esta se poña á súa disposición. No caso de non aceptar a recarga dentro do devandito prazo, esta recarga caducará e perderán o dereito a percibila. As persoas beneficiarias das axudas establecidas neste Convenio poderán consultar o estado das súas recargas na páxina web <https://tmg.xunta.gal/consulta-tarxeta>, ou na que en cada momento habilite a Dirección Xeral de Mobilidade. Neste sentido, este sistema de pagamentos operará de xeito análogo a como o fai o actual programa tarifario social no Transporte Metropolitano.

No caso dos descontos correspondentes aos bonos da concesión, no caso de que a súa aplicación se realice a través da TMG ou tarxetas integradas, a Xunta de Galicia procesará as colectas remitidas polas empresas concesionarias adheridas e determinará o total de viaxes de cada unha das tarxetas. Para aquelas tarxetas que acaden o número de 50 viaxes no mes natural (ou o que corresponda, segundo o tipo de bono), con orixe e destino no ámbito definido neste convenio, e que fosen canceladas en autobuses dunha mesma concesión de transporte, calculará o importe da bonificación que lles correspondería de ter adquirido un bono da indicada concesión (inicialmente, 17,50 euros, para o bono de 50 viaxes) e reintegrará este importe ás persoas usuarias co mesmo procedemento e prazo de materialización que se estableceu para o reembolso das bonificacións “sociais”.





Tendo en consideración que a aplicación do sistema de xestión dos bonos anteriormente indicados será de aplicación a aqueles concesionarios dos indicados no anexo I que se adhiran ao mesmo, o Concello de Ribeira resérvase a facultade de establecer unha bonificación por viaxe equivalente ás previstas neste convenio para aquelas persoas usuarias que opten por adquirir estes bonos directamente á empresa concesionaria, ou no caso de concesionarios que opten pola súa xestión directa.

4. Obrigas económicas relativas ás bonificacións tarifarias

Bonificación de uso xeral. A bonificación de uso xeral aplicable co pagamento mediante o uso de calquera das tarxetas integradas é asumida integramente polo Concello de Ribeira e xestionada pola Xunta de Galicia.

Para tal fin, a empresa concesionaria cobrará da tarxeta o importe bonificado (inicialmente, 0,85 €). Posteriormente, nos primeiros días hábiles de cada quincena, a Xunta de Galicia procesará a información das máquinas canceladoras remitida pola empresa a través da aplicación SITME, ou análoga que a substitúa, e a Dirección Xeral de Mobilidade abonará á empresa concesionaria correspondente o importe total da compensación que corresponda á dita quincena tendo en conta o desconto de 0,50 € por viaxe.

Bonificacións sociais. Corresponde ao Concello de Ribeira o pagamento íntegro das compensacións que correspondan polas bonificacións sociais que o dito concello estableza segundo o establecido nas estipulacións anteriores.

Estas bonificacións serán abonadas materialmente pola Dirección Xeral de Mobilidade nas tarxetas das persoas beneficiarias, consonte co indicado na estipulación anterior.

Bonos das concesións. O importe correspondente ao desconto pola aplicación destes bonos será asumido pola empresa concesionaria que corresponda.

As contías correspondentes serán reintegradas pola Dirección Xeral de Mobilidade ás persoas usuarias con dereito ao desconto utilizando o procedemento análogo ao correspondente ás bonificacións sociais, incluída a previsión de período de disposición e caducidade da recarga.





5. Contías das achegas

O Concello de Ribeira asume o custo íntegro da bonificación xeral e das bonificacións sociais, coas previsións indicadas respecto da utilización da TMG Xente Nova, asumida pola Xunta.

Con carácter previo á entrada en vigor da aplicación destas bonificacións, o Concello de Ribeira transferirá á conta xeral da Xunta de Galicia o importe correspondente ao respectivo concepto para o exercicio 2021, calculado de forma estimativa no anexo III do presente convenio. O importe correspondente ao 2021 poderá ser axustado pola Dirección Xeral de Mobilidade, tendo en conta a data a partir da que sexa efectiva a aplicación real da correspondente bonificación.

Respecto das achegas correspondentes ao resto de anualidades do convenio, ao inicio de cada exercicio a Dirección Xeral de Mobilidade remitirá ao concello a liquidación do ano anterior xunto co importe que lle corresponderá ao concello ingresar no corrente. O Concello de Ribeira ingresará o importe calculado, consonte co anterior, para o novo exercicio no prazo máximo de dous meses a contar dende a data da súa comunicación.

Para o caso de que as estimacións inicialmente realizadas sexan previsiblemente insuficientes para atender os pagamentos das bonificacións fixadas neste convenio, a Dirección Xeral de Mobilidade requirirá ao concello que achegue o importe necesario para manter o seu financiamento no correspondente exercicio. Os novos ingresos deberán materializarse no prazo dun mes a contar dende a data na que se realice a correspondente comunicación.

O conxunto de achegas realizadas polo Concello de Ribeira serán obxecto de incorporación na aplicación orzamentaria 09.02.512A.470.1 dos orzamentos xerais da Comunidade Autónoma de Galicia.

No caso das bonificacións sociais, de non ser suficiente o crédito achegado polo concello para facer fronte ás obrigas establecidas neste convenio, e ter transcorrido o prazo para realizar a achega complementaria, a Dirección Xeral de Mobilidade suspenderá o reintegro ás persoas usuarias ata que se materialice e xustifique a realización da indicada achega por parte do Concello de Ribeira.





Importe correspondente a bonos das concesionarias

No caso dos bonos das concesións que se chagasen a xestionar a través da tarxeta TMG, o importe correspondente será deducido pola Dirección Xeral de Mobilidade dos pagamentos mensuais por compensacións previstas neste convenio que deba realizar á concesionaria á que corresponda facer fronte ao custo do dito bono.

6. Tarifa Xente Nova

A Xunta de Galicia ten previsto a expansión do ámbito territorial de aplicación da Tarifa *Xente Nova* aos servizos do transporte público interurbano da súa titularidade ata abranguer a totalidade da Comunidade Autónoma, e que supón a bonificación do 100% do custo do viaxe para menores de 21 anos. Está prevista a súa entrada en funcionamento para o primeiro semestre de 2021. Esta bonificación será asumida integramente pola Xunta de Galicia, segundo o establecido na cláusula Quinta deste convenio.

7. Duración

De acordo co establecido na cláusula Sexta, o convenio de colaboración entrará en vigor o mesmo día da súa sinatura, e manterá a súa vixencia ata o 31 de decembro de 2024. Posteriormente, segundo o establecido na devandita cláusula, este convenio poderá ser obxecto de prórroga expresa no marco dos acordos institucionais acadados para o mantemento das bonificacións máis alá da data inicialmente prevista, ata por un máximo de catro anos máis, e coas obrigas xurídicas e financeiras establecidas para a aprobación da referida prórroga, previo acordo entre ámbalas dúas partes asinantes.

8. Informe da Dirección Xeral de Planificación e Orzamentos

O obxecto do presente proxecto de Convenio é establecer as bases da colaboración entre a Consellería de Infraestruturas e Mobilidade da Xunta de Galicia e o Concello de Ribeira para o establecemento de accións de promoción da utilización do transporte público no Concello de Ribeira. Este obxecto supón unha relación de colaboración que non ten o carácter de subvención segundo o disposto no artigo 2.3 do Regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro.





Polo tanto, considérase que non procede solicitar á Dirección Xeral de Planificación e Orzamentos, dependente da Consellería de Facenda e Administracións Públicas, a emisión do informe de coherencia e compatibilidade previsto no artigo 40.2b), en relación aos artigos 18.2 e 19 do citado Regulamento, pois neste mesmo sentido se manifestou a dita Dirección Xeral en varios informes, entre os que podemos citar; o informe do 08/05/2020 do director xeral de Planificación e Orzamentos sobre o proxecto de Convenio de Colaboración entre a Consellería de Infraestruturas e Mobilidade da Xunta de Galicia e o Concello de Barbadás para o establecemento de accións de promoción da utilización do transporte público no Concello de Barbadás.

A xefa do Servizo de Coordinación dos Plans de Transporte

Marta Figueiras García

O subdirector xeral de Ordenación do Transporte

Antón García Río

O director xeral de Mobilidade

Ignacio Maestro Saavedra (*Documento asinado dixitalmente*)

